

Na osnovu člana 15. Zakona o udruženjima i fondacijama („Sl. novine FBiH“, br. 45/02), člana 6. Statuta o izmjenama i dopunama Statuta Udruženja poslodavaca FBiH, i Odluke Upravnog odbora UPFBiH od 06.10.2015. godine Skupština **Grupacije poslodavaca Tuzlanskog kantona pri Udruženju poslodavaca u FBiH** na sjednici održanoj dana 22.10.2015. godine u Tuzli donosi:

P O S L O V N I K
O ORGANIZACIJI I RADU
GRUPACIJE POSLODAVACA TUZLANSKOG KANTONA
PRI UDRUŽENJU POSLODAVACA FBiH

I OPĆE ODREDBE

Član 1.

Članice UPFBiH sa područja Tuzlanskog kantona formiraju Grupaciju poslodavaca Tuzlanskog Kantona pri Udruženju poslodavaca FBiH(u daljem tekstu: Grupacija).

Grupacija je shodno Statutu Udruženja poslodavaca u FBiH organizacioni oblik dobrovoljnog udruživanja članova Udruženja poslodavaca u Federaciji BiH (u daljem tekstu: Udruženje), a čija je osnovna djelatnost zaštita interesa članstva sa područja Tuzlanskog kantona (u daljem tekstu: Kantona).

Grupacija sve svoje djelatnosti obavlja u okviru Udruženja.

Član 2.

Ovim Poslovníkom utvrđuju se: ciljevi, djelatnost, naziv i sjedište, članstvo, organizacija, organi, način izbora tijela, odlučivanje, finansiranje i druga pitanja značajna za rad Grupacije.

II CILJEVI I DJELATNOST

Član 3.

Ciljevi Udruženja su istovremeno i ciljevi Grupacije, s tim što Grupacija svoje aktivnosti naročito usmjerava na:

- predstavljanje i zastupanje interesa članova u odnosima sa sindikatima i predstavnicima vlasti na nivou kantona;
- kolektivno pregovaranje, te sudjelovanje u sklapanju kolektivnih ugovora kojima se uređuju pitanja iz radnih odnosa i u vezi s radnim odnosima na području kantona;

- zastupanje članova Grupacije u ESV-u na nivou kantona;
- praćenje i izučavanje privrednih tokova u Kantonu,
- unaprjeđenje zajedničkog tržišnog i poslovnog nastupanja;
- ostvarivanje suradnje sa institucijama na području kantona i zastupanje interesa članova Grupacije u oblasti ekonomske, porezne i politike zapošljavanja;
- uključivanje u postupke donošenja zakonskih i podzakonskih akata za područje kantona;
- kao i druge aktivnosti od značaja za rad članica Grupacije.

Član 4.

Radi ostvarenja ciljeva iz prethodnog stava Grupacija obavlja sljedeće djelatnosti:

- Kolektivno pregovaranje na području Kantona,
- Predlaganje neophodnih zakonskih, socijalnih i administrativnih mjera,
- Zastupanje članstva u ESV-ima,
- Davanje savjeta o privrednim problemima nadležnim organima vlasti kao i članovima Udruženja, na svoju inicijativu ili po zahtjevu,
- Obavlja i druge djelatnosti u skladu sa ciljevima Grupacije, koje su u skladu sa Statutom Udruženja i ovim Poslovníkom.

Član 5.

Grupacija može u suradnji s nadležnim kantonalnim organima i organima Udruženja, pokretati inicijative i predlagati mjere ekonomske politike koje se tiču poslovanja njenih članica.

III NAZIV I SJEDIŠTE

Član 6.

Naziv Grupacije je: Grupacija poslodavaca Tuzlanskog kantona pri Udruženju poslodavaca u FBiH.

Skraćeni naziv Grupacije je : Grupacija poslodavca Tuzlanskog kantona (GP TK)

Sjedište Grupacije je u Tuzli.

Udruženje za potrebe rada Grupacije može otvoriti ured u Kantonu.

Odluku o otvaranju ureda donosi Upravni odbor Udruženja poslodavaca u FBiH.

IV ČLANSTVO U GRUPACIJI

Član 7.

Članovi Grupacije su svi pojedinačni, kolektivni i počasni članovi u skladu sa članom 12. Statuta Udruženja koje obavlja djelatnost na području Kantona i koji imaju sjedište ili podružnicu na nivou Kantona.

Članstvo u grupaciji je dobrovoljno.

Članovi iz stava 1. ovog člana organiziraju se u Grupaciju da bi mogli uspješno raditi i uticati na unaprjeđenje rada i poslovanja u svojim djelatnostima, na usklađivanju svojih posebnih i pojedinačnih interesa sa zajedničkim interesima članova Grupacije i Udruženja, te sa općim interesim privrede na području Kantona, FBiH i jedinstvenom tržišnom i privrednom prostoru u BiH.

Član 8.

Svojstvo novog člana Grupacije stiće se učlanjenjem u Udruženje poslodavaca u FBiH a u skladu sa Statutom Udruženja i ovim Poslovníkom.

Prava i dužnosti članova grupacije

Član 9.

Članovi Grupacije imaju ista prava u pogledu obaveza i odgovornosti.

Prava, obaveze i odgovornosti članova Grupacije su:

- upravljaju aktivnostima, poslovima i unapređuju organizaciju rada Grupacije,
- poduzimaju aktivnosti na promicanju i zaštiti interesa članova Grupacije,
- pokreću inicijative i utvrđuju prijedloge za donošenje mjera iz oblasti razvojne i ekonomske politike, kao i privrednog i društvenog sistema na području Kantona,
- razmjenjuju informacije od interesa za uspješno obavljanje djelatnosti,
- poduzimaju aktivnosti na realizaciji vlatitih projekata,
- ostvaruju suradnju sa nadležnim kantonalnim tijelima, organizacijama i drugim institucijama Kantona radi zaštite interesa članova,
- aktivno sudjeluju u radu Udruženja i Grupacije,
- ravnopravno učestvuju u radu organa i tijela Udruženja,
- imaju pravo da biraju i budu birani u organe Udruženja,
- imaju pravo da biraju i budu birani u rad tijela drugih institucija u kojima je potrebno imenovati predstavnike Grupacije,
- bude zastupan u kolektivnom pregovaranju i zaključivanju kolektivnih ugovora na nivou kantona;
- pridržavaju se Poslovníkom utvrđenih prava i obaveza članova;
- moralno i na drugi način podupiru djelatnosti i ugled Grupacije Udruženja;

- poštivaju dogovorene profesionalne standarde i Kodeks profesionalne etike Udruženja;
- plaćaju članarinu.

Sva prava i obaveze članova iz prethodnog stava realizuju se u koordinaciji sa Udruženjem.

Članarina

Član 10.

Članovi Grupacije uplaćuju članarinu na osnovu Odluke o visini članarine Udruženja poslodavaca FBiH.

Članarina se uplaćuje na račun Udruženja poslodavaca u FBiH.

Udruženje poslodavca u FBiH može otvoriti poseban račun za Grupaciju.

Član 11.

Odlukom Upravnog odbora Grupacije može se uz članarinu iz člana 9. odrediti i obaveza plaćanja posebne članarine ili priloga u cilju finansiranja posebnih djelatnosti ili aktivnosti Grupacije.

Donacije Udruženja koje obezbjedi Grupacija koriste se u svrhe rada Grupacije.

V ORGANIZACIJA I RAD GRUPACIJE

Član 12.

Rad Grupacije je javan.

Organi Grupacije kroz infrastrukturu Udruženja poslodavaca FBiH (mediji, časopisi, publikacije Udruženja i dr.) izvještavaju članove i javnost o ciljevima i aktivnostima Grupacije. Po potrebi to čine i samostalno kroz dostavljanje dokumenata, zapisnika i slično.

Član 13.

Grupacija ne može svojim aktivnostima nanositi štetu Udruženju, grupacijama Udruženja i njihovim članovima i ostalim Udruženjima te dovoditi u neravnopravan položaj druge djelatnosti, odnosno grane privrede.

Član 14.

O poslovima i pitanjima iz svoje nadležnosti Grupacija donosi prijedloge i zaključke samostalno, pridržavajući se smjernica i stavova Skupštine i tijela Grupacije, nadležnih organa i tijela Udruženja i u skladu sa ustaljenim običajima poslovnog morala.

Član 15.

Grupacija može, u okviru svoje djelatnosti neposredno upućivati prijedloge nadležnim tijelima Udruženja, radi rješavanja određenih pitanja i poduzimanja odgovarajućih mjera od interesa za Grupaciju ili pojedine članove kada nisu u suprotnosti sa općim interesima članova ove Grupacije ili Udruženja u cjelini.

Član 16.

Stručna pitanja, problemi i aktivnosti iz nadležnosti Grupacije, zavisno od njihove prirode razmatraju se i rješavaju u okviru Upravnog odbora Grupacije i njenih drugih radnih tijela (komisija).

Organi Grupacije i način odlučivanja i upravljanja

Član 17.

Organi i tijela grupacije su:

- **Skupšina Grupacije**
- **Upravni odbor Grupacije**
- **Komisije**

Skupština

Član 18.

Skupština Grupacije je najviši organ upravljanja radom i poslovanjem Grupacije.

Predsjednika i dva zamjenika predsjednika Skupštine Grupacije bira Skupština na period od četiri (4) godine.

Skupština Grupacije:

- donosi Poslovnik o organizaciji i radu Grupacije, njegove izmjene i dopune, te druge opće akte određene ovim Poslovnikom,

- bira i razrješava predsjednika i dva zamjenika predsjednika Skupštine Grupacije;
- bira i razrješava članove Upravnog odbora Grupacije;
- bira i razrješava članove delegacije u ESV-u na nivou Kantona;
- utvrđuje opću politiku rada i djelovanja, te donosi temeljne odrednice za program rada,
- razmatra i zauzima stajalište o izvještajima tijela Grupacije u skladu s odredbama ovoga Poslovnika,

Po potrebi Skupština može osnivati i imenovati odgovarajuća tijela, kad je to potrebno radi rješavanja pojedinih pitanja, u skladu s odredbama ovoga Poslovnika.

Član 19.

Skupštinu Grupacije čini 30 (trideset) članova.

Članove Skupštine biraju Opštinska Udruženja:

Udruženje poslodavaca Tuzla	5 članova
Udruženje poslodavaca Gračanica	5 člana
Udruženje poslodavaca Gradačac	4 člana
Udruženje poslodavaca Srebrenik	3 člana
Udruženje poslodavaca Živinice	3 člana
Udruženje poslodavaca Lukavac	2 člana
Udruženje poslodavaca Kladanj	2 člana
Udruženje poslodavaca Sapna	1 član
Udruženje poslodavaca Kalesija	1 član
Udruženje poslodavaca Čelić	1 član
Udruženje poslodavaca Banovići	1 član
Udruženje poslodavaca Doboj Istok	1 član
Udruženje poslodavaca Teočak	1 član

Prilikom izbora kandidata mora se učiniti napor da se obezbijedi adekvatna zastupljenost članova po osnovu djelatnosti, veličini firme te nacionalna i spolna zastupljenost.

Ukoliko nisu formirana Opštinska Udruženja delegate ispred tih Opština bira Upravni odbor Grupacije.

Skupštini mogu prisustvovati i učestvovati u radu Skupštine i svi članovi Grupacije bez prava odlučivanja.

Član 20.

Redovne sjednice Skupštine Grupacije održavaju se najmanje jednom godišnje.

U slučaju potrebe može se sazvati vanredna sjednica Skupštine. Vanredna sjednica Skupštine može se sazvati radi rješavanja posebno značajnih pitanja za rad Grupacije.

Član 21.

Sjednicu Skupštine Grupacije saziva i predsjedava joj Predsjednik Skupštine Grupacije, a u slučaju njegove spriječenosti prvi zamjenik predsjednika Skupštine Grupacije.

Poziv za sjednicu Skupštine Grupacije upućuje se članovima Skupštine najkasnije sedam (7) dana prije dana održavanja sjednice.

Poziv za vanrednu sjednicu upućuje se članovima Skupštine najkasnije tri (3) dana prije dana održavanja sjednice.

U pozivu za sjednicu treba naznačiti prijedlog dnevnog reda sjednice, mjesto njena održavanja i vrijeme početka rada.

Uz poziv za sjednicu Skupštine članovima se dostavljaju svi materijali pripremljeni za Skupštinu.

Član 22.

Skupština može punovažno odlučivati ako je na sjednici prisutno najmanje 2/3 (dvije trećine) 20 članova Skupštine.

Svaki član Skupštine Grupacije ima pravo glasa.

Odsutnog člana Skupštine Grupacije može zamijeniti drugi član Skupštine Grupacije, uz pisanu punomoć.

Glasanje na Skupštini je javno.

Član 23.

Skupština Grupacije donosi odluke o donošenju novog ili promjeni postojećeg Poslovnika dvotrećinskom (2/3) većinom glasova prisutnih članova Skupštine Grupacije, a sve ostale Odluke donose se običnom većinom glasova prisutnih članova Skupštine Grupacije.

Za donošenja novog ili promjenu postojećeg Poslovnika Skupština Grupacije mora zatražiti saglasnost Udruženja poslodavaca FBiH.

Odluke o donošenju novog Poslovnika ili o promjeni postojećeg Poslovnika dostavljaju se Udruženju poslodavaca FBiH.

Član 24.

Na sjednici Skupštine Grupacije vodi se zapisnik, u koji se moraju zabilježiti doneseni zaključci, odluke i rezultati izbora.

Zapisnik sa sjednice Skupštine Grupacije potpisuje Predsjednik Skupštine Grupacije, dva ovjerivača i zapisničar.

Zapisnik sa sjednice Skupštine Grupacije zajedno sa zaključcima i odlukama dostavlja se svim članovima Grupacije i Udruženju poslodavaca FBiH.

Upravni odbor

Član 25.

Upravni odbor je operativni organ upravljanja Grupacijom.

Upravni odbor Grupacije ima slijedeće nadležnosti:

- priprema sjednice Skupštine Grupacije;
- provodi politiku, zaključke i druge odluke koje je donijela Skupština Grupacije i Skupština Udruženja;
- bira i razrješava predsjednika i dva zamjenika predsjednika UO;
- bira i razrješava predstavnike Grupacije u druge institucije u koje je potrebno imenovati predstavnike poslodavaca,
- utvrđuje prijedloge za imenovanje članova Upravnog Odbora Grupacije,
- priprema i predlaže nacрте dokumenata koje usvaja Skupština i Upravni odbor Grupacije,
- predlaže članove Grupacije za predstavnike u Skupštini, Upravnom odboru Udruženja poslodavaca u FBiH, te ESV FBiH i drugim institucijama u skladu sa Statutom Udruženja.
- raspravlja i donosi zaključke i preporuke o temama koje su od interesa za članove Grupacije.
- Imenuje, savjetuje i nadzire osobe ovlaštene za kolektivno pregovaranje i sklapanje kolektivnog ugovora, te verificira rezultate pregovora,
- prenesi ovlasti za sklapanje kolektivnog ugovora na Udruženje poslodavaca u FBiH,
- rješava i druga pitanja koja nisu stavljena u nadležnost drugom tijelu Grupacije.

Član 26.

Upravni odbor Grupacije čini ukupno 13 članova.

Upravni odbor ima pravo da kooptira još 5 članova Upravnog odbora.

Svaki član Grupacije može predložiti članove Upravnog odbora.

Za članove Upravnog odbora mogu biti birani predstavnici članova Grupacije, koji su vlasnici, suvlasnici, direktori, članovi uprave ili prokuristi.

Prilikom predlaganja i izbora članova Upravnog odbora, treba se učiniti napor da se obezbjedi adekvatna zastupljenost po teritoriji, veličini firme, djelatnosti, te nacionalnoj i spolnoj strukturi.

Član 27

Upravni odbor između svojih članova na mandat od četiri (4) godine bira Predsjednika i dva Podpredsjednika Upravnog odbora.

Mandat članova Upravnog odbora traje četiri (4) godine i mogu se birati na tu funkciju najviše dva puta uzastopno.

Mandat članova Upravnog odbora može prestati i prije isteka vremena na koji su izabrani u slučaju: smrti i gubitka pravne sposobnosti, istupanjem iz članstva, podnošenjem ostavke, ako neopravdano tri puta uzastopno ne prisustvuje sjednicama UO, opozivom od strane nadležnog organa.

Upravni odbor može izvršiti zamjenu najviše jedne trećine (1/3) članova Upravnog odbora kome je prestao mandat po osnovu iz prethodnog stava.

Mandat novog člana Upravnog odbora traje do isteka mandata Upravnog odbora.

Dužnost člana Upravnog odbora je volonterska.

Član 28.

Upravni odbor saziva Predsjednik Upravnog Odbora Grupacije.

Upravni odbor sastaje se u pravilu jednom u tri mjeseca.

U pozivu za sjednice mora biti naznačeno mjesto i vrijeme održavanja, te dnevni red sjednice.

Na sastanke UO obavezno se poziva i Predsjednik Skupštine Grupacije.

Upravni odbor može donositi pravovaljane odluke ako sjednici prisustvuje natpolovična većina članova Upravnog odbora.

Odluke se donose većinom glasova prisutnih članova, ako ovim Poslovníkom nije drugačije određeno.

Upravni odbor može po potrebi držati telefonsku ili elektronsku sjednicu.

Zapisnike sa sjednica kao i sve Odluke Upravnog odbora dostavljaju se Udruženju poslodavaca u FBiH.

Komisije

Član 29.

Radi zaštite specifičnih interesa članovi Grupacije mogu osnovati Komisije.

Komisije se bave pitanjima od zajedničkog interesa za obavljanje, unaprjeđivanje i promoviranje neke djelatnosti unutar Grupacije, te se osnivaju radi lakšeg rješavanja određene problematike i razmjene iskustava iz određene oblasti.

Komisije dostavljaju prijedloge, zaključke i mišljenja drugim tijelima Grupacije, a mogu nastupati i prema vani putem za to ovlaštenih osoba Grupacije.

Stručna služba

Član 30.

Stručne, administrativne, pomoćne i druge poslove Grupacije obavlja u pravilu stručna služba Udruženja.

U dogovoru sa Upravnim odborom Udruženja poslove iz stava 1. ovog člana mogu obavljati i druge osobe koje angažuju članovi UO Grupacije.

VI FINANSIRANJE

Član 31.

Finansijska sredstva potrebna za rad Grupacije i njenih tijela u skladu sa Odlukom o osnivanju, osiguravaju se iz članarine Udruženja u okviru njegovog Finansijskog plana, koju u skladu sa Odlukom Skupštine Udruženja, plaćaju svi članovi Udruženja.

VII INFORMIRANJE I KOMUNICIRANJE

Član 32.

Rad svih organa je javan.

Upravni odbor Grupacije najmanje jednom u tri mjeseca podnosi izvještaj o svom radu Udruženju poslodavaca u FBiH.

O stavovima, zaključcima i odlukama Grupacije članstvo se informira putem Newslettera Udruženja poslodavaca u FBiH.

Zapisnici sa sastanaka svih organa Grupacije obavezno se dostavljaju Udruženju poslodavaca u FBiH.

VIII PRIJELAZNE I ZAVRŠNE ODREDBE

Član 33.

Ovaj Poslovnik mora biti u skladu sa Statutom Udruženja poslodavaca u FBiH.

Ukoliko nešto nije regulisano ovim Poslovnikom primjenjuje se Statut Udruženja poslodavaca u FBiH.

Član 34.

Obavezuje se Upravni odbor Grupacije da najdalje u roku od 6 mjeseci organizuje Skupštinu Grupacije na kojoj će izvršiti izbor članova za organe Grupacije u skladu sa Statutom Udruženja poslodavaca u FBiH i ovim Poslovnikom.

Upravni odbor će prije prve redovne Skupštine utvrditi kriterije za izbor članova Upravnog odbora.

Mandat izabranih članova organa Grupacije traje do prve Skupštine Grupacije.

Član 35.

Ovaj Poslovnik stupa na snagu danom usvajanja.

Član 36.

Izmjene i dopune ovog Poslovnika vrše se na način utvrđen za njegovo donošenje.

Tuzla, 22.10.2015.godine



Predsjedavajući

Ramiz Karić